



Benedictus anno millesimo quingētesimo decimo quinto in Sueuia natus & educatus fuit. Is cum præclara indole esset præditus, parentibus uisum fuit, ut bonis studijs addicaretur. Itaq; primis artium fundamētis in patria perceptis, sese postea Friburgum Brisgauriæ contulit, atq; diligenter operam literis dedit. Cum earum mediocrem usum percepisset, ut commodius & religioni & literis uacaret, adhuc adolescens sese ad monasteriū Sueuiæ Schussenriedt, non procul Biberaco, contulit, & ibidem Præmonstratensium ordinem assumpsit. Monasterium illud in Constantiensi diocœsi fundatum erat ad fluuiū Schussen, Anno 1188,

in honorem D. Virginis Marię & S. Magni confessoris, à Berengario & Conrado baronibus de Schussenriedt, qui arcem suam ad eum usum conuerterūt. In eo loco Fridericus primus fuit Præpositus. Verùm tempore Concilij Basiliensis Conradus Rauber¹⁵ præpositus Abbatis priuilegia & ornamēta pontificalia consecutus est.